


**TEZAU LITURGIC**  
**12 MARTIE**

**SLUJBA**  
**SF. IERARH**  
**GRIGORIE I**  
**CEL MARE,**  
**EPISCOPUL**  
**ROMEI**



**MOSCOVA, 2000**



# Мѣсяца Мѣрта въ 12-й дѣнь Служба иже во святыхъ отцу нашему Григорію Двоеслову, папѣ Римскому

## НА ВЕЛИЦѢЙ ВЕЧЕРНИ,

[Блаженъ мужъ..., 1-й антифонъ.] На Господи  
воззвахъ: **стихиры, гласъ 4:**

**И**зъ млада возлюбилъ еси Христа, преподобне, миръ и вся красная преобидѣвъ, богатство истощилъ еси на милостыню, и многія обители создалъ еси, стезю открывъ ведущую къ небесі, и предуготовавъ себе къ небеснымъ обителемъ, почилъ еси. И нынѣ, предстоя Святѣй Троицѣ, молися о насъ, святе Григоріе, чтущихъ святую память твою. **[Дважды.]**

**Н**равы благими украсился еси, дѣвство и нищетѣ цѣловавъ, имѣній твоихъ Христа ради не пощадивъ, и домъ свой во обитель претворилъ еси, сподобился еси пріяти сугубую благодать святительства, и нынѣ радуяся въ небесныхъ обителѣхъ, помолися о насъ, іерарше Григоріе, чтущихъ святую память твою. **[Дважды.]**

**В**ся во Христа стяжалъ еси, и чистоту душевную, и милосердіе къ убогимъ не изреченное, со ангелы бесѣдовалъ еси, и Христа

пріяти сподобилъ еси́, отъ Него́ же дарами чудотворе́ній обогати́лся еси́, въ міръ житіе́мъ равноа́нгельнымъ просі́явъ, и во свѣ́тлости святы́хъ лику́я, моли́ся о на́съ, святи́телю Григо́ріе, спасти́ся душа́мъ на́шимъ. **[Два́жды.]**

**Н**аслѣ́дникъ престо́ла Петро́ва отъ Самаго́ Го́спода наре́клся еси́, Григо́ріе, и того́ нра́вы воспрі́ймъ, всего́ себе́ Христу́ повину́въ, въ поще́ніихъ изря́дно пребыва́я, ми́лостыню благосе́рдно творя́, а́нгельское вои́нство возвесели́лъ еси́, съ ни́мъ же е́ще въ тѣ́леси́ сый непреста́нно пребыва́я, ны́нѣ же созерца́яй Святу́ю Тро́ицу и пѣ́снопѣ́ніе прино́ся, моли́ся о на́съ, уба́жающихъ тя́, свя́те Григо́ріе. **[Два́жды.]**

### **Сла́ва, гла́съ 8:**

**Ч**удное твоё милосе́рдіе кто́ исповѣ́сть, о́тче преблаже́нне Григо́ріе? Егда́ а́нгелу Бо́жію во о́бразѣ́ навкли́ра, прише́дшему къ тебѣ́, ми́лостыню три́жды пода́лъ еси́, сего́ ра́ди Го́сподь, ви́дя твоё кра́йнее къ ни́щимъ и вдови́цамъ милосе́рдіе, первопресто́льника святы́я Своея́ Це́ркве, за ню́ же излі́я кро́вь Свою́, и насле́дника свята́го верхо́внаго апо́стола Петра́, тя́ наре́че, его́ же добродѣ́тели стяжа́лъ еси́, и съ ни́мъ вкупѣ́ водворя́яся во оби́тельхъ нерукотворе́нныхъ, помоли́ся о на́съ,



свѣ́те іе́ра́рше Григо́ріе, соверша́ющихъ всера́достную и приснопа́мятную па́мь твою́.

### **И ны́нѣ, гла́съ то́йже:**

**Ца́рь** Небе́сный [за челове́колюбіе на земли́ яви́ся и съ челове́ки поживе́, от Дѣ́вы бо Чи́стыя плоть́ прие́мый и изъ Нея́ проше́дый съ воспри́ятіемъ, еди́нь е́сть Сы́нъ, сугу́бъ естество́мъ, но не впоста́сію. Тѣ́мже, соверше́нна Того́ Бо́га и соверше́нна Челове́ка воистинну́ проповѣ́дающе, исповѣ́дуемъ Христа́ Бо́га на́шего: Егѡ́же моли́, Ма́ти Безневѣ́стная, поми́ловатися душа́мъ на́шимъ].

### **Та́же вхо́дъ. Прокі́мень дне́. Чте́нія святи́тельскія.**

### **Прит́чей чте́ніе.**

**Па́мь** пра́веднаго съ похва́лами, и благослове́ніе Господне́ на главѣ́ егѡ́. Блаже́нь челове́къ, иже обрѣ́те премудро́сть, и сме́ртенъ, иже увѣ́дѣ́ разу́мъ. Лу́чше бо сію́ купова́ти, не́жели злата́ и сребра́ сокрови́ща. Честнѣ́йшая же е́сть ка́меній многоцѣ́нныхъ, все́ же честное́ недостойно́ ея́ е́сть. Долгота́ бо дне́й и лѣ́та живота́ въ десни́цѣ ея́, въ шу́йцѣ́ же ея́ бога́тство и сла́ва. Отъ у́стъ ея́ исхо́дитъ пра́вда, зако́нъ же и ми́лость на язы́цѣ́ но́ситъ. Послу́шайте у́бо мене́, о ча́да, честна́я бо реку́, и блаже́нь

человѣкъ, иже пути моя сохрани́ть: исходи́ бо мой — исходи́ живота́, и уготовля́ется хотѣ́ніе отъ Гóспода. Сего́ ради молю́ васъ и предлагаю́ мой гла́съ сыновомъ́ челове́ческимъ. Яко́ азъ, премудро́сть, устроихъ́ совѣ́тъ, и разумъ́ и смы́слъ азъ́ призвахъ́. Мой совѣ́тъ и утвержде́ніе, мой разумъ́, моя́ же крѣ́пость. Азъ́ мене́ любя́щія́ люблю́, ищущіи́ же мене́ обря́щутъ́ благода́ть. Разумѣ́йте у́бо, незло́бивіи, кова́рство, ненака́зани́и же, прилага́йте сердца́. Послу́шайте мене́ и па́ки, честна́я бо реку́, и отвѣ́рзу отъ́ устенъ́ правая́, яко́ истинѣ́ поучи́тся горта́нь мой, ме́рзки же пре́до мною́ устны́ лживы́я. Съ правдою́ вси́ глаго́лы у́стъ моихъ́, ничто́же въ́ нихъ́ стрóпотно, ниже́ развра́щенно. Вся́ права́ сү́ть разумѣ́вающимъ́ и прóста обрѣ́тающимъ́ разумъ́. Научаю́ бо васъ́ истинѣ́, да бу́детъ о́ Гóсподѣ́ наде́жда ва́ша, и испо́лнитеся́ Духа́.

### **Премудрости Соломо́ни чтѣ́ніе.**

**У**ста́ праведна́го ка́плютъ премудро́сть, устнѣ́ же муже́й му́дрыхъ́ вѣ́дятъ благода́ть. Уста́ му́дрыхъ́ поуча́тся премудро́сти, правда́ же изба́вляеть ихъ́ отъ́ сме́рти. Сконча́вшуся́ мужу́ праведну́, не поги́бнетъ наде́жда. Сы́нъ бо праведенъ́ ражда́ется въ́ живо́тъ и во благо́ихъ́ своихъ́ пло́дъ правды́ объ́иметь. Свѣ́тъ праведнымъ́ всегда́, и отъ́ Гóспода обря́щутъ́ благода́ть и сла́ву. Язы́къ му́дрыхъ́ до́брая

свѣсть, и въ сѣрдцѣ ихъ почіетъ мѹдрость. Любитъ Господь преподобная сердца, пріятни же Емѹ вси непорочнии въ пути. Мѹдрость Господня просвѣщаетъ лице разумнаго: постигаетъ бо желающія ю, прѣжде даже разумѣти ю, и удобъ узрится отъ любящихъ ю. Утреневавый къ ней не утрудится, и бдяй ея ради вскорѣ безъ печали будетъ. Яко достойныхъ ея сама обходитъ, ищущи, и во стезяхъ ея является имъ благопріемнѣ. Мѹдрости никогдаже одолѣетъ злоба. Сихъ ради и рачитель быхъ доброты ея, и возлюбихъ ю, и поискахъ отъ юности моея. И взыскахъ невѣсту привести себѣ, яко всѣхъ Владыка возлюби ю. Тайбница бо естъ Божія хитрости и обрѣтательница дѣлъ Его. Труды ея сѹть добродѣтели: цѣломѹдрию же и разуму та учитъ, правдѣ и мѹжеству, ихже потребнѣе ничтоже естъ въ житіи человѣкомъ. Аще же и многаго искуства желаетъ кто, вѣсть дрѣвняя, и быти хотящая разсмотритъ. Свѣсть извѣтія словесъ и разрѣшенія гаданій, знаменія и чудеса проразумѣетъ, и сбытія временъ и лѣтъ, и всѣмъ совѣтникъ естъ благъ. Яко безсмертіе естъ въ ней и благославіе во общеніи словесъ ея. Сего ради бесѣдовахъ ко Господу, и помолихся Емѹ, и рѣхъ отъ всего сѣрдца моего: Бже отцевъ и Господи милости, сотвориый вся словомъ Твоимъ и мѹдростию Твоею устройый человѣка,

да владѣть бѣвшими отъ Тебѣ тварьми и да управляетъ мѣръ въ преподобіи и правдѣ. Дажь ми Твоихъ Престо́ловъ присѣдающую премудрость и не отлучи мене отъ отро́къ Твоихъ, яко азъ ра́бъ Твой и сынъ рабыни Твоея. Посли ю съ Небѣсъ отъ святаго жилища Твоего и отъ Престо́ла славы Твоея, да, сущи со мною, научить мя, что́ благоугодно е́сть предъ Тобою, и наставлятъ мя въ разумъ, и сохранитъ мя въ сла́вѣ своей. Помышленія бо смѣртныхъ вся боязлива и погрѣшительна умышленія ихъ.

### **Премудрости Соломо́ни чтѣніе.**

**П**охваляему праведнику, возвеселятсѣ людіе: безсмѣртіе бо е́сть па́мьять его́, яко отъ Го́спода познава́ется и отъ чело́вѣкъ, и уго́дна Го́сподеви ду́ша его́. Возлюбите у́бо, о му́жіе, му́дрость и поживете: восхо́дите ея и наказани бу́дете. Нача́ло бо ея́ любви́ и соблюде́ніе зако́на. Почтите́ премудрость, да во вѣ́ки ца́рствуете. Возвѣщу́ вамъ и не скрю́ю отъ ва́съ таи́нъ Бо́жіихъ, яко То́й му́дрости наставля́никъ е́сть, и му́дыхъ испра́витель, и вся́кому смы́слу и дѣ́лу хитре́ць. И всѣ́мъ смы́сломъ научи́тъ му́дрость, е́сть бо въ не́й Ду́хъ разу́менъ и свѣ́тъ, и сія́ніе свѣ́та присносу́щнаго, и о́бразъ бла́гости Бо́жія. Та́я дру́ги Бо́жія и проро́ки устраи́етъ, благолѣ́пнѣйши же е́сть со́лнца и па́че вся́каго сотворе́нія звѣ́здъ, свѣ́ту сосужда́ема, обрѣ́та́ется



пѣрвѣйши. Тая угождающихъ ей отъ болѣзни  
 избави и настави на стези правыя. Дадѣ имъ  
 разумъ имѣти святъ, и сохрани я отъ ловящихъ,  
 и подвигъ крѣпокъ подадѣ имъ. Да разумѣютъ  
 вси, яко сильнѣйши всего естъ благочестіе, и  
 никогдаже преможетъ злоба мудрости, ниже  
 прейдетъ злыя обличаючи судъ. Рекоша же въ  
 себѣ, помысливше неправедно: насильствуемъ  
 праведному, и не пощадимъ преподобства его,  
 ни усраимся сѣдинъ старости многолѣтны.  
 Будетъ бо намъ крѣпость — законъ и уловимъ  
 праведнаго, яко неугоденъ намъ естъ, и  
 противится дѣломъ нашимъ, и поноситъ намъ  
 отпаденіе закона, и обличаетъ намъ согрѣшенія  
 наказанія нашего. Возвѣщаетъ намъ разумъ  
 имѣти Божій, и отрока Господня себе именуетъ.  
 Бысть намъ на обличеніе помышленій нашихъ и  
 тяжекъ намъ естъ и видимъ, яко неподобно  
 инымъ житіе его, и измѣнены стези его. Въ  
 поруганіе вмѣнихомся ему, и удаляется отъ  
 путей нашихъ, яко отъ нечистотъ, и блажитъ  
 послѣдняя праведныхъ. Увидимъ убо, аще  
 словеса его истинна суть, искусимъ, яже  
 сбываются ему. Руганіемъ и мукою истяжемъ  
 его, да разумѣемъ кротость его и искусимъ  
 беззлобство его, смѣртію безобразною осудимъ  
 его, будетъ бо посѣщеніе отъ словесъ его. Сія  
 помыслиша и прельстишася, ослѣпи бо я злоба

ихъ, и не разумѣша таинъ Божіихъ и не разсудиша, яко Ты еси Богъ единъ, живота имѣяй и смѣрти власть, и спасаая во время скорби, и избавляая отъ всякаго зла. Щедръ и Милостивъ, и давай преподобнымъ Своимъ благодать, и Своєю мышцею гордымъ противляйся.

### На стиховнѣ стихіры, гласъ 1:

**Ч**то ты наречемъ, Григоріе? Милосердія ли источникъ, яко не имущимъ и бѣднымъ явился еси благотворитель, и въ нуждахъ скорый помощникъ, сего ради и въ лицѣ святыхъ жити сподобился еси. Молися о душахъ нашихъ.

**Стихъ:** Уста моя возглаголють премудрость, [и поученіе сердца моего разумъ].

**Ч**то ты возыменуемъ, славне? Кротостію бо украсился еси, яко множицею на трапезѣ посаждая страннихъ и нищихъ, самъ служитель имъ показался еси, тѣмже и сподобился еси наслѣдникъ быти въ землі кроткихъ, и пришель еси въ покой нескончаемый, въ Царство небесное.

**Стихъ:** Уста праведнаго поучатся премудрости, и языкъ его возглаголетъ судъ.

**В**есь богоносецъ показася, Григоріе, языкомъ убо божественная являя, дѣломъ же творя заповѣданная Спасомъ, иноческіе уставы

преше́лъ еси́, имѣ́нїя твоя́ Бо́гу предпосла́въ,  
чисто́ту и смире́нїе возлюбѣ́въ, въ  
нерукотворѣ́нныхъ обите́лѣхъ всели́лся еси́, о́тче,  
во вѣ́ки.

### **Сла́ва, гла́съ 2:**

**П**ра́вило вѣ́ры и о́бразъ крото́сти тя  
позна́хомъ, о́тче святи́телю Григо́ріе, и чисто́ты  
рачи́теля и столпа́ Правосла́вія, а́нгеломъ  
единонравна и моли́твенника о душа́хъ на́шихъ.

### **И ны́нѣ, гла́съ тойже:**

**О**, чудесе́ но́ваго, всѣ́хъ дре́внихъ чудесъ! [Кто́  
бо позна́ Ма́терь, безъ му́жа ро́ждшую и на руку́  
нося́щую всю́ тва́рь Суще́щаго? Бо́жіе е́сть  
изволе́нїе Ро́ждшееся. Егоче́́ яко́ Младѣ́нца,  
Пречи́стая, Твоѣ́ма рука́ма носѣ́вшая, и  
ма́тернее дерзнове́нїе къ Нему́́ иму́щая, не  
преста́й моля́щи о́ чту́щихъ Тя, уще́дрити и  
спасти́ ду́ши на́ша].

### **Тропа́рь, гла́съ 1:**

**М**ило́сти и благоутро́бія сокрови́ще, е́же всѣ́мъ  
отве́рзлъ еси́, правовѣ́рія учи́телю и архіере́овъ  
Божество́нное удобре́нїе, о́тче святи́телю  
Григо́ріе, ни́щихъ бы́лъ еси́ засту́пникъ. Тѣ́мъ  
моли́ Христа́ Бо́га, спасти́ся душа́мъ на́шимъ.

## Сла́ва, и ны́нѣ:

Гаврі́илу вѣща́вшу Тебѣ́, Дѣ́во, ра́дуйся, [со гла́сомъ воплоща́шеся всѣхъ Вла́дыка въ Тебѣ́, свѣ́тъмъ киво́тъ, я́коже рече́ пра́ведный Дави́дъ, яви́лася еси́ ши́ршая небѣ́сь, поно́сивши Зижди́теля Твоего́: сла́ва Всѣ́льшемуся въ Тя́; сла́ва Проше́дшему изъ Тебе́; сла́ва Свобо́дившему насъ Рожде́ствомъ Твои́мъ].

## НА УТРЕНИ,

[**На Бо́гъ Госпо́дь: Тропа́рь свѣ́тителя, два́жды. Сла́ва, и ны́нѣ, богоро́диченъ.**]

**По 1-й стихоло́гии съда́ленъ, гла́сь 2:**

Духо́вную му́дрость стяжа́лъ еси́, о́тче Григо́рие, я́же принесё тебѣ́ пло́дъ возде́ржанія и кра́йняго милосе́рдія, и́мже угоди́въ Го́споду, насле́довалъ еси́ ца́рство Христо́во, иди́же и насъ не забу́ди, да изба́вимся тлѣ́нія и искуше́ній, чту́щии па́мь твою́ вѣ́рно. [**Два́жды.**]

## Сла́ва, и ны́нѣ, богоро́диченъ:

Обнови́ла еси́, Чи́стая, Божѣ́ственнымъ Рожде́ствомъ Твои́мъ истлѣ́вшее во страсте́хъ земноро́дныхъ ме́ртвенное сущест́во и воздвигла еси́ всѧ́ отъ сме́рти къ живу́ту нетлѣ́нія. Тѣ́мже Тя́ по до́лгу блажи́мъ вси́, Дѣ́во Препросла́вленная, я́коже проре́кла еси́.



## **По 2-й стихоло́гии сѣда́лень, гла́сь 8:**

**П**ремудрости во́ды почерпль еси́ отъ неоскудѣмага исто́чника — Христа́, источи́ль еси́ правосла́вія рѣ́ки, любове́ю же и милосе́рдіемъ вѣ́рныхъ сердца́ возвесели́ль еси́, сего́ ради и Христо́съ просла́ви тя́ жити́ въ ра́дости а́нгеловъ и святы́хъ, иди́же о́ насъ моли́ся Христу́ Бо́гу прегрѣше́ній оставле́ние дарова́ти, праждну́ющимъ святу́ю па́мять твою́. **[Два́жды.]**

## **Сла́ва, и ны́нѣ, богоро́диченъ:**

**Б**лагодаримъ Тя́ прісно, Богоро́дице, и велича́емъ, Чи́стая, и покланя́емся, воспѣ́вающе Рожде́ство Твое́, Благода́тная, вопію́ще непреста́нно: спаси́ насъ, Дѣ́во Всеми́лостивая, я́ко Благая́, и прило́га діавольскаго исхи́ти, да не посра́мимся въ ча́съ су́дный, раби́ Твои́.

## **Та́же поліе́лей, посе́мъ сѣда́лень, гла́сь 2:**

**Ц**ерковь прино́ситъ ти́, о́тче, хвале́бная пѣ́нія, я́ко сію́ до́брѣ́ упасль еси́, ми́лостію же и нестяжа́ніемъ а́нгелы возвесели́ль еси́, съ ни́ми же моли́ся о́ насъ Го́споду, спасти́ся на́мъ. **[Два́жды.]**

## **И ны́нѣ, праждника́, или́ богоро́диченъ:**

**М**а́терь Тя́ Бо́жію мо́лимъ вси́, Дѣ́ву войсти́нну и по рождествѣ́ явля́ющуюся, любове́ю

прибѣгающи къ Твоей бла́гости: Тебе́ бо има́мы, грѣ́шнии, Предста́тельницу, Тебе́ стяжа́хомъ въ напа́стехъ спасе́ніе, еди́ну Всенепоро́чную.

**Та́же степе́нна, 1-й антифо́нъ 4-го гла́са. Прокі́менъ, гла́съ 4:** Уста́ моя возглаго́лютъ премудро́сть,\* и поуче́ніе се́рдца моего́ разу́мъ. **Сти́хъ:** Услы́шите сія́, вси́ язы́цы, [вну́шите, вси́ живу́щи по вселе́ннѣй]. **Вся́кое дыха́ніе... Ева́нгеліе отъ Іоа́нна, за́чало [35 отъ полу́].**

**По 50-мъ псалмѣ́ стихи́ра, гла́съ 6:**

**На** апо́стольтѣ́мъ престо́лѣ́ сѣ́дѣ, преподо́бне, того́ и нра́вы украси́лся еси́, смире́ніемъ же вы́сокая дости́гъ, къ го́рнему Сіо́ну преста́вился еси́, помоли́ся, святи́телю Григо́ріе, Спа́су Христу́, е́же умири́ти лю́ди и спа́стся душа́мъ нашимъ.

**Кано́нъ [Богоро́дицы со ирмосо́мъ на 6 и святи́теля на 8], гла́съ 2.**

**Пѣ́снь 1.**

**Ирмо́съ:** *Гряді́те лю́діе, поі́мъ пѣ́снь Христу́ Бо́гу, раздѣ́льшему мо́ре и наста́вльшему лю́ди, я́же изведе́ изъ рабо́ты египетскія, я́ко просла́вися.*

**Д**обраго ко́рене священна́я розга́ бы́лъ еси́, житі́емъ, вѣ́рою и любове́ю процвѣ́лъ еси́, и наслѣ́дникъ небеса́наго ца́рствія яви́лся еси́.

**В**енце́мъ смире́нія, а́ки нѣ́коею дража́йшею у́тварию украси́лся еси́, вся́ ми́рская возненави́дѣвъ Христа́ ра́ди, и убо́гихъ возлюбивъ, Ца́рство небе́сное наслѣ́довалъ еси́.

**А**ще въ ю́ности́мъ тѣ́леси́ у́мъ соверше́нъ стяжа́лъ еси́, бога́тство твоё не на украше́ніе су́етное, но на созида́ніе оби́телей, и учрежде́ніе убо́гихъ и страна́ныхъ исто́щилъ еси́, тѣ́мъ и Христо́съ украси́ тя нетла́ніемъ.

**Богородичень:** **К**то́ досто́йно изочтѣ́тъ вели́чія чуде́съ Твои́хъ, Богоблагада́тная, я́ко родила́ еси́ Еди́наго отъ Тро́ицы, Христа́ Бо́га на́шего, Егѡ́же моли́ спастися на́мъ.

### **Пѣснь 3.**

**Ирмо́сь:** *Процвѣ́ла е́сть пусты́ня я́ко кринъ Го́споди, язы́ческая непло́дящая це́рковь, прише́ствіемъ Твои́мъ, въ не́йже утверди́ся мое се́рдце.*

**П**роцвѣ́лъ еси́ Дави́дски, святи́телю, въ житі́и твоёмъ, егда́ а́нгелу Бо́жію во о́бразѣ навкли́ра три́жды въ еди́нъ де́нь ми́лостыню пода́лъ еси́, и́же пребы́сть съ тобо́ю во вся́ дни́ живота́ твоего́.

**Т**оли́каго ра́ди нестяжа́нія и кра́йняго къ́ убо́гимъ ми́лосе́рдя, Го́сподь наре́че тя́ первопресто́льника Це́ркве Свое́я, и на́мѣстника́ верхо́внаго Свое́го апо́стола Пе́тра, съ ни́мже мо́ли́ся о на́съ, свя́те Григо́ріе.

**Б**ожество́ннымъ оза́ряемъ свѣ́томъ, на престо́лѣ́ святи́тельстѣ́мъ сѣ́дѣ, лю́ди благо́разу́міемъ упасѣ́ еси́, на́учая́ я́ правосла́внымъ догма́тамъ, Христу́ приве́лѣ еси́. Но и на́съ не забу́ди, святи́телю, присѣ́щая́ святы́ми твои́ми моли́твами.

**Богоро́диченъ:** Безсѣ́менно во чре́вѣ́ Бо́га зачала́ еси́, и ражда́еши не́сказа́нно вопло́щенна, на Не́гоже зрѣ́ти не смѣ́ютъ, Чи́стая, небе́сныя си́лы, Приснодо́во.

### **Сѣ́даленъ, гла́съ 6:**

**А**ще́ у́бо Дави́дъ глаго́летъ: блаже́нъ разу́мѣва́й на ни́ща и убо́га; то ко́льми́ па́че блаже́нъ еси́ ты́, святи́телю Григо́ріе, я́ко убо́гимъ и стра́ннымъ имѣ́ніе твоѐ расточи́лѣ еси́, того́ ра́ди а́нгелы и Са́маго́ Христа́ Го́спода прі́яти и на трапѣ́зѣ́ твоѣ́й учреді́ти сподо́бился еси́, но помина́й на́съ, мо́лимъ тя́, во святы́хъ твои́хъ моли́твахъ, ихже́ досто́йно ны́нѣ́ прино́сиши Го́споду. **[Два́жды.]**



## Сла́ва, и ны́нѣ, богоро́диченъ:

Не́бо небеси́ не довлѣтъ Тебѣ́, Влады́ко, но на́съ ра́ди обнища́въ всели́лся еси́ во утробу́ смиренному́дрыя Твоея́ Ма́тере, Ея́ же мо́льбы пріими́ о на́съ, Го́споди, и поми́луй ны́.

## Пѣ́снь 4.

**Ирмо́съ:** Услы́шахъ, Го́споди, слухъ Твоего́ смотре́нія, и просла́вихъ Тя́, Еди́не Чело́вьколю́бче.

**К**райнимъ милосе́рдіемъ, свя́те, стяжа́лъ еси́ некра́домое бога́тство, я́ко не су́щу ти е́ще во святите́льствѣ́, мно́гая во оби́тели твое́й чуде́са содѣ́лалъ еси́.

**Б**о́жіимъ наре́ченіемъ избра́нъ бы́лъ еси́ па́пою, но скры́лся еси́ въ пусты́нныя мѣ́ста, убѣ́гая то́ль вы́сокаго са́на и почита́нія чело́вѣ́ческаго, Бо́жіимъ же про́мысломъ показ́ся то́ мѣ́сто, на нёмъ же бы́лъ еси́ въ столпѣ́ огненнѣ́.

**Е**гда́ Бо́жіимъ изволе́ніемъ прія́лъ еси́ святите́льскій са́нъ, усугу́билъ еси́ попече́ніе о ни́щихъ и убо́гихъ, е́гоже да стяжи́мъ и мы́, помоли́ся о на́съ ко Го́споду.

**Богоро́диченъ:** Мо́лимъ Тя́, Чи́стая, Я́же Бо́га безсѣ́менно заче́нши, прі́сно моли́ти за рабы́ Твоя́.

## ПѢСНЬ 5.

**Ирмось:** *Свѣта Подателю, и вѣковъ Творче, Господи, во свѣтъ Твоихъ повелѣній настави насъ: развѣ бо Тебѣ, много Бога не знаемъ.*

**Восшѣдъ** на апостольскій престолъ, яко свѣтильникъ возсіалъ еси, святе Григоріе, ученіи яже о Святѣй Троицѣ, Ейже нынѣ молися о чтущихъ тя.

**Не** тако благородствомъ по плоти, якоже смиреніемъ и милосердіемъ просіалъ еси, отонудуже и даровъ невѣщественныхъ сподобился еси.

**Царства** Христова наслѣдникъ потщался еси быти, злата и сребра не пощадилъ еси убогихъ ради, и сего ради восприѣмлеши отъ Христа стократное мздовоздаяніе.

**Богородичень:** **Несказанно** зачатіе и не постиженъ естъ образъ рожденія, Бога бо плотию родила еси, и на рукахъ Твоихъ носила, Мати Дѣво Пресвятая, Егоже моли о воспѣвающихъ Тя.

## ПѢСНЬ 6.

**Ирмось:** *Бѣдна мя многа грѣховная окружаетъ, и вопію Ти, пророка подражая: отъ тли мя, Господи, возведи.*

**Б**ѣздну милосѣрдїа, смиренїа вѣрхъ, и любве твоея, святе Григорїе, кто исповѣсть, имиже украсилъ еси душу твою для Царства Христова.

**Л**юбвеобильный источникъ въ тебѣ, отче показася, егда не точию о приходящихъ къ тебѣ милосѣрдовавъ, но и во Іерусалимѣ страннопрїимницу создалъ еси, да упокоятся страннии и нищии.

**Т**щаніе единое тебѣ, отче, да не имущи пребудутъ безбѣдны, сего ради въ гору Синайскую, по вся лѣта живота твоего, многую на препитаніе инокомъ милостыню посылалъ еси.

**Богородичень:** **Б**ѣздну милосѣрдїа и неисчерпаемый источникъ благодати, познахомъ Тя, Богомати Дѣво Владычице, тѣмъ Тя величаемъ.

### **Кондакъ, гласъ 2:**

**Я**ко Петрова престола намѣстника, столпа Православіа и милосѣрдїа источникъ, святителя Григорїа, вѣрнии вси восхвалимъ, той убо языкомъ вѣщаая, дѣломъ же совершаая Спасова глаголанїа, сего ради и прославился еси, яко божественный тайникъ Божїа благодати.

## Икосъ:

**Н**е то́чию ѣже стяжа́ти, но и своя́ имѣ́нїя со  
успе́рдїемъ исто́щилъ еси́ на созида́нїе оби́телей и  
дово́льствуя стра́нныхъ и ни́щихъ, тѣ́мъ  
Христо́съ па́стыря и на́мѣстника Петро́ва  
престо́ла устраи́ваетъ тя, е́гоже нра́вы украси́лся  
еси́, и просла́вился еси́, я́ко божество́нный  
тайнникъ Бо́жія благода́ти.

## Пѣснь 7.

**Ирмо́съ:** *Образу злато́му, на по́ль Деи́ръ  
служи́му, тре́ Твои́ о́троцы небрего́ша  
безбо́жнаго вель́нїя, посредѣ́ же огня́ ввержени,  
ороша́еми, пояху́: благослове́нь еси́, Бо́же оте́ць  
нашихъ.*

**Ж**ену́, усумне́вшуюся о пречи́стыхъ тай́нахъ  
Христо́выхъ, увѣ́рилъ еси́, претвори́въ хлѣ́бъ въ  
ви́дъ са́маго иста́го тѣ́ла челове́ческаго, и па́ки  
претвори́въ е́ въ хлѣ́бъ.

**Ж**итіе́мъ равноа́нгельнымъ и дивны́ми чудесы́  
Церко́вь Христо́ву украси́лъ еси́, тѣ́мъ лю́діе  
взы́ваху о тебѣ́: благослове́нь Бо́гъ оте́ць  
нашихъ.

**Д**у́хъ Святы́й въ ви́дъ голу́бинъ показаваше́ся  
надѣ́ тобо́ю, егда́, о́тче, писа́лъ еси́  
боговдохнове́нныя твоя́ бесѣ́ды, ихже́ съ  
любо́вію наслажда́ющеся, взы́ваемъ:  
благослове́нь Бо́гъ оте́ць нашихъ.



**Богородиченъ:** Всякій родъ и возрастъ чтимъ Тебѣ, Богородительнице, и непрестанно поемъ: благословенъ Богъ отецъ нашихъ.

## Пѣснь 8.

**Ирмосъ:** *Неизреченною мудростію составльшаго всяческая Бога Слова и отъ не сущихъ во еже быти приведшаго, благословіте, дѣла, яко Господа, и превозносите во вся вѣки.*

**Бесѣды** твоя во умиленіе, святителю, приводятъ чтущихъ я, якоже бо рѣка великая очищаетъ аеръ, тако и сіи отгоняютъ злосмрадіе отъ душъ нашихъ, присно взывающихъ: Господа пойте и превозносите во вся вѣки.

**Не** точію преподалъ еси Цѣрквѣ Христовѣ исправленія, отче Григоріе, но и Литургію Преждеосвященныхъ, Духомъ Божіимъ наставляемъ, составилъ еси, юже святая Цѣрковь совершая по вся Четырдесятницы, во умиленіи взываетъ: Господа пойте и превозносите во вся вѣки.

**Собралъ** еси сказанія житій святыхъ во Италійстѣй странѣ богоугодно прожившихъ и поученія душеспасительная, и самъ сподобился еси вписанъ быти въ книгу живота, тѣмъ взываеши: Господа пойте и превозносите во вся вѣки.

**Богородичень:** Изъ Отца прошедшаго прежде вѣкъ безлѣтнаго Бога Слова, и въ послѣдняя возсіявша изъ Дѣвы, пойте и превозносите во вся вѣки.

### Пѣснь 9.

**Ирмосъ:** *Безначальна Родителя Сынъ, Богъ и Господъ, воплощся отъ Дѣвы, намъ явися, омраченна просвѣтити, обрати расточенная, тѣмъ Всепѣтую Богородицу, величаемъ.*

**Б**ожественныхъ твоихъ словесъ насладившеся, Григоріе, въ твоей памяти торжествующе, вопіемъ ти: моли о насъ Господа, да избавимся прегрѣшеній.

**А**ще и тѣломъ подвизался еси на земли, но со безплотными сподобился предстати Господу на небеси, идѣже молися о насъ, святе Григоріе.

**Д**ухомъ въ вышнемъ Сіонѣ живѣши нынѣ и назираеши свѣше призывающія тя, святителю Григоріе, тѣмъ молимъ тя, испроси намъ у Христа очищенія и велія милости.

**Богородичень:** **К**рѣпосте моя, Пречистая Богородительнице, моли со всѣми святыми избавити мя геенны и вѣчнаго осужденія.

### Свѣтилень:

**Т**роичнымъ свѣтомъ освѣщаемъ, и во свѣтлости святыхъ ликуя, о Григоріе мудре!

Подаждь и намъ благодать, да воспѣваемъ непрестанно Свѣта Невечернаго — Отца, Сына и Святаго Духа. **[Дважды.]**

**[Слава, и нынѣ,] богородиченъ:**

**П**редстательство Твое воспѣваемъ, Богородительнице, заступи насъ отъ житейскихъ страстей прилога и просвѣти насъ свѣтомъ Твоимъ, Владычице.

**На хвалитехъ стихиры, гласъ 2:**

**Р**ѣки источилъ, отче, воды живы по глаголу Спасову, вѣрою и любовію украсился еси, Духа Святаго мвроположница былъ еси, яже бо усты вѣщалъ еси во спасеніе, потщался еси вся совершити дѣломъ, и сего ради велий нареклся еси въ Царствіи Христовѣ. **[Дважды.]**

**С**олнцеобразно просіялъ еси, святителю, на тверди церковнѣй, страшную ону уразумѣвъ славу святыхъ, юже добродѣтелями потщался еси наслѣдити, и нынѣ во дворѣхъ Господнихъ живѣши, молися о душахъ нашихъ.

**К**то исповѣсть, отче, смиреніе твое? Или кто не прославитъ крайняго милосердія, еже явилъ еси къ нищимъ и станнымъ? Ими же ангельское воинство возвеселилъ еси, съ нимъ же молися Господеви о душахъ нашихъ.

## Сла́ва, гла́сь 6:

**Ч**еловѣ́че Бо́жій и вѣ́рный уго́днице Христо́въ, строи́телю То́го таи́нь и му́жу желáній духо́вныхъ, сто́лпе одушевле́нный и вдохнове́нный о́бразъ, я́ково второ́го Петра́ ты Ри́мская Це́рковь, чуде́щаяся, прія́ла е́сть, и моли́твенника о ду́шахъ на́шихъ.

## И ны́нѣ, гла́сь то́йже:

**Б**огоро́дице, Ты́ еси́ лоза́ и́стинная, [возрасти́вшая на́мъ Пло́дъ живота́, Тебѣ́ мо́лимся: моли́ся, Влады́чице, со святы́ми апо́столы поми́ловати ду́ши на́ша].

## НА ЛИТУРГИИ,

**Служба святителемъ обща:** [Блаже́нна, отъ **канона святителя пѣснь 3 и 6. Прокі́мень, гла́сь 1:** Уста́ моя возглаго́лють премудро́сть,\* и поуче́ніе се́рдца моего́ ра́зумъ. **Стихъ:** Услы́шите сія́ вси́ язы́цы, внушите́ вси́ живу́щии по вселе́ннѣй. **Апо́столь ко Евре́омъ, зачáло 318. Аллилу́ія, гла́сь 2:** Уста́ праведна́го поуча́тся премудро́сти, и язы́къ его́ возглаго́летъ судъ. **Стихъ:** Зако́нь Бо́га его́ въ се́рдцѣ́ его́, и не за́пнутся стопы́ его́. **Ева́нгеліе Іоáнна, зачáло 36. Прича́стенъ:** Въ па́мять вѣ́чную бу́детъ праведникъ, отъ слуха́ зла́ не убой́тся].



**Источникъ: Служба святому Григорію  
Двоеслову, папѣ Римскому.** Составлена  
вологодскимъ помѣщикомъ Андреемъ  
Стефановичемъ Петровскимъ. — Рукопись изъ  
библіотеки святителя Филарета (Дроздова),  
митрополита Московскаго, 1855. — [10 л.]

